

Nuuk, februaarip 7-at 2010

Inatsisartut suleriaasianni § 36 immikkoortoq 1 naapertorlugu matumuuna Naalakkersuisunut apeqquteqarpunga, ima ittumik:

Suli Naalakkersuisut isumaqarpat nunatsinni kræftertut suliaritinnissaminut utaqqitinneqarneq ajortut aammalu suliaritinnissamut ullut utaqqiffiusut ikinnerpaaffilerneqarnissaat pisariaqanngitsoq?

(Inatsisartuni ilaasortaq Aleqa Hammond, Siumut)

Tungavilersuut:

Inatsisartut ukiaq 2009-mi ataatsimiinneranni ataani atsiortunga inatsisartuni aaliangiiffigisassatut siunnersuuteqarpunga kræftimi napparsimalersimasut tuavioernerpaamik suliaritinneqarnissaat siunertaralugu ullut utaqqiffiutinneqartartut ikinnerpaaffilerneqarnissaannik siunertalimmik. Naalakkersuisut taakkualu inatsisartuutitaasa tapersersunngilaat tungavilersuutigalugu utaqqisoqarneq ajortoq aammalu ullut ikinnerpaaffilerneqartariaqanngitsut utaqqisoqarneq ajormat, siunnersuullut itigartitsissutigineqarpoq.

Ataani atsiortunga assut immikkut suliaqartut ilisimasaat ataqqisaraara taamaammat ulluni kingullerni sermitsiaq.ag-mi nunatsinni nakorsap oqariartuutaa kræftertortatsinnut suliaritinnissamut utaqqitinneqartartut amerlavallaartut aammalu suliaritinnissamut ullut ikinnerpaaffilerneqarsinnaaneranik ujartuisoq qisuariarfiginngitsoorsinnaanngilara. Nakorsap oqariartuutigaa kræftimik napparsimasut utaqqitinneqartarnerisa kingunerisaanik toqumik kinguneqartartut aammalu utaqqitinneqartarsimannikkaluaruit toqqutigisimasinnaanngikkaluarai.

Maanna Naalakkersuisut aperissuakka ilumut suli isumaqarnersut kræftimik napparsimasut nappaatip paasineqarneraniit suliaritinnissamut ullut ikinnerpaaffilerneqarnissaat qulakkeerneqassasoq pisariaqanngitsutut isigineraat aammalu suli isumaqarnersut tamanna ajornartorsiutaanngitsoq?

Eqqaasitsissutigissangakku ullut qulit suliffiusut qaangiutsinnagit apeqqutiga akineqarsimassasoq.

Ikinngutinnersumik inuulluaqqusillunga
Aleqa Hammond, Siumut